



官板

珠編

卷四

補遺

和 4
635
84



門和4
號 635
卷 6



編珠第四卷

補遺

詹事府詹事兼翰林院侍讀學士高士奇補

黍稷部

九穀五種

六周禮曰廩人掌九穀以待匪頒賜稍

食月令曰季冬之月令告民出五種

計耦耕事注五種五穀種也

合穎連莖

魏收後魏書曰許謙字元遜子洛陽為

雁門太守家田三生嘉禾皆異隴合穎
春秋說題詞曰嘉禾之滋莖長五尺
五七三十五故連莖三十五穗以成盛
德

六穗三苗

虞預會稽典錄曰謝承遷吳郡督郵歲
穰嘉禾六穗生於部屬尚書大傳曰
成王時有苗異莖而生同爲一穗人有
上之者王召周公而問之公曰三苗爲

一穗天下其和爲一乎

北里禾南山豆

史記曰管仲說桓公曰古之封禪者北
里之禾所以爲盛西漢楊惲詩曰田
彼南山蕪穢不治種一頃豆落而爲糞
人生行樂耳須富貴何時

照九阿齊萬畝

阮籍詩曰垂穎臨曾城餘光照九阿
曹植頌曰秀吐穟萬畝齊平蔭蓋隴百

穢不生

九熟再種

抱樸子曰南海晉安有九熟之稻 楊

孚異物志曰交趾冬又熟農者一歲再

種

半夏一旬

蔡邕月令章句曰十月獲稻人君嘗其

先熟故在九月熟者謂之半夏 王子

年拾遺記曰東有融澤五穀多良有浹

日之稻言一旬而生也

香穗紫芒

周處風土記曰穰稻之青穗米皆青白

也 郭義恭廣志曰有虎掌稻紫芒稻

赤穰稻南方有蟬鳴稻

五里香三月種

魏文帝與朝臣書曰江表惟長沙名有

好米何得比新成稞稻耶上風吹之五

里聞香 崔實四民月令曰三月可種

杭稻

龍枝鳳冠

王子年拾遺記曰東極之東有龍枝之粟言其枝屈曲如游龍也食之善走又曰有鳳冠粟似鳳之冠食之令人多力

德精仁卉

瑞應圖曰嘉禾五穀之長盛德之精也晉徵祥說曰王者盛德則嘉禾生嘉

禾者仁卉也

禾二米麥九穗

晉徵祥說曰嘉禾生其大盈箱一稔二米崔鴻前涼錄曰永嘉元年嘉麥一莖九穗生於姑臧

麥兩岐禾九穗

東觀漢紀曰張堪為漁陽太守勸民耕種以致殷富百姓歌曰桑無附枝麥秀兩岐張君為政樂不可支齊書曰孝

武時固始縣嘉禾一莖六穗新蔡縣又獲一莖七穗一莖九穗

西山禾東極豆

阮籍詩曰豈若西山草琅玕與丹禾拾遺記曰東極之東有傾離之豆見日卽傾葉食之歷歲不饑豆莖皆大若指綠色爛熳數畝

黑穞白穞

廣志曰穞有烏穞黑穞又有青幽白夏

之名 袁淮觀殊俗曰河內青稻新成白穞

黑粟赤黍

崔豹古今注曰武帝建元四年天雨粟宣帝地節四年長安雨黑粟竟寧元年南陽山都縣雨粟色青黑味苦大者如小豆小者如麻子 韓子曰吳起欲攻秦小亭置一石赤黍於東門外令人能徙于西門外者賜之上田宅人爭徙之

乃下令曰。明日攻秦。能先登者與之大
夫。賜之上田宅。于是攻之。一朝而拔。

瓊膏玉粒

拾遺記曰。東極之東。有瓊脂粟。質白如
玉。柔滑如膏。食之多壽。又曰。員嶠之
山。名環丘。上有方湖。千里。多大鵠。高一
丈。羣飛於湖際。銜採不周之粟。於環丘
之上。粟生穗高五丈。其粒皎然如玉也。
青芋稻。紅苳麻。

廣志曰。青芋稻。六月熟。累子稻。白漢稻。
七月熟。此三種大且長。拾遺記曰。東
極之東。有倒葉麻。如倒苳。紅紫色。亦名
紅冰麻。食之令人顏色潔白。鮮好。

五梁禾三味麥

續仙傳曰。王莽種五梁禾於殿前。先以
鶴髓玳瑁犀玉二十餘物。漬種。此黃帝
穀仙之術也。注。五梁禾。卽五色禾。元
晏春秋曰。衛倫過元晏。取糗糧以進。元

晏嘗之曰麥也。有杏李奈三味。三果之熟也。不同時。子焉得兼之。倫笑而不言。退謂人曰。士安之識過劉子陽。吾家多園樹。杏發糝以杏汁。李奈發又糝以李奈汁。故兼此三味耳。簡文詩。糧持三味麥。衣進八蠶綿。

搖枝粟倒葉麻

拾遺記曰。東極之東。有搖枝粟。言其枝長而弱。無風自搖。食之多壽。下見紅

苴麻

蟬鳴稻蟻子梁

郭義恭廣志曰。蟬鳴稻。五月熟。稻有益下白。正月種。五月穫。穫其莖。根復生。九月復熟。又曰。鹽鑽梁粒如蟻子。魏文帝以爲粥。

長生米同穎禾

梁簡文帝謝賚長生米。啟曰。食乃民天之貴。粒有延齡之名。藉此資身。因斯養

性 尚書曰唐叔得禾異畝同穎獻諸天子王命歸周公於東作歸禾

紅冰赤穢

上見紅苕麻 下見紫芒

木禾膏黍

山海經曰崑崙墟上有木禾禾長五尋

又曰廣都之野后稷葬焉爰有膏黍

膏稷

旅生草化

東觀漢記曰建武二年天下野穀旅生麻菽尤盛 江表傳曰孫亮五鳳元年交趾稗草化為稻

祖靈天貺

曹植魏德論謳曰猗猗嘉禾惟穀之精昔生周朝今植魏庭獻之廟堂以昭祖靈 宋武帝嘉禾讚曰維殷粵周有穗表禎非原非澤乃瑞乃靈庶藉天貺廣茲化清

藟葉薊蕒

潘安仁射雉賦曰闕問藟葉。慎歷乍見藟麥也。禮記曰祭宗廟之禮。梁曰薊蕒。

董梁穉米

禾秀為穗而不成者謂之董節。爾雅謂之董梁。漢武帝紀曰野谷旅生曰穉米。

一囊千斛

漢書東方朔曰侏儒長三尺餘俸一囊粟。臣朔長九尺餘亦俸一囊粟。侏儒飽欲死。臣朔飢欲死。語林曰陳壽將為三國志謂丁梁州曰若可覓千斛米見借當為尊公作佳傳。丁不與遂以無傳。

菜蔬部

嘉樹芳菰

呂氏春秋曰餘菴之南有菜名嘉樹其色若碧。曹植七啟曰芳菰精澤霜蓄。

露葵

元都綺蔥碧海琅菜

漢武內傳曰七月七日西王母降遺帝

元都綺蔥一本又曰西王母曰仙之

上藥有碧海琅菜

屬賓菜具區菁

西域傳曰屬賓地温和冬食生菜 呂

氏春秋曰菜之美者具區之菁

春韭冬葵

齊書曰周顛獨處山舍王儉問曰卿山

中何食曰赤米白鹽綠葵紫蓼太子問

菜何者勝曰春初早韭秋末晚菘 列

仙傳曰丁次都不知何許人為遼東丁

氏作奴丁氏常使買葵冬得生葵問何

得此葵云從日南買來

三畝蔥一畦韭

晉令曰居洛陽內園菜欲以當課者聽

其引長流灌紫蔥可各三畝 漢書曰

龔遂勸民令人一口種五十本葱一畦
韭百本薤

七菜三韭

蜀都賦曰五肉七菜勝掩腥臊 齊書
曰庾杲之食常有韭菹淪韭任昉戲之
曰誰謂庾郎貧食常有二十七種謂三
種韭也

食菜三種種葱百年

杜蘭香別傳曰香降張碩賚瓦榼酒七

子。棵棵多菜而無他味亦有世間常菜
輒有三種色或丹或紫一物與海蛤相
象并有非時菜碩云食之亦不甘然一
食七八日不飢 列仙傳曰阮丘蛆山
上種葱百餘年乃去

菜傭葱肆

漢書曰周紆爲洛陽令下車先問大姓
主名吏數閭里豪彊以對紆厲聲曰本
問貴戚若馬竇等輩豈能知此賣菜傭

乎。于是貴戚跼躄，京師肅清。梁書曰：呂僧珍爲冠軍將軍，封平國侯。其先以販蔥爲業。及僧珍貴，其兄子棄業求官。僧珍不許，曰：汝等自有常分，豈可妄求。但當速歸蔥肆耳。

秋蓄菜春加蔥。

月令曰：仲秋之月，乃命有司趣民務蓄菜。莊子曰：春月飲酒加蔥，以通五臟。北蕃葵南山蕨。

陸機園葵詩曰：翩翩晚彫葵，孤生寄北蕃。被蒙覆露惠，微軀後時殘。晉書曰：齊王冏秉政，張翰謂顧榮曰：天下紛紛未已，吾本山林人，無望於時久矣。當采南山蕨，飲三江水。

凝露葵負霜薤。

文選曰：青青園中葵，凝露待日晞。潘安仁賦曰：白薤負霜。

倭國菜天門蔥。

魏志曰倭國地溫和冬夏食生菜 春
秋元命苞曰天門山上有蔥所種畦隴
悉著行人拔取者悉絕若精神而求卽
不拔自出奇異辛香

葵園蔥嶺

陸機詩曰種葵北園中葵生鬱萋萋
西河舊事曰蔥嶺在燉煌西八十里其
山高大上生蔥故曰蔥嶺
拔葵遺蒜

史記曰公儀休爲魯相食葵而美拔其
園葵棄之 高士傳曰周黨見閔仲叔
食無菜遺之生蒜仲叔曰我欲省煩耳
今更作煩耶受而不食

剪韭獻芹

後漢書曰郭林宗見友來夜冒雨剪韭
作炊餅 嵇康絕交書曰野人有快曝
背而美芹子者欲獻之至尊雖有區區
之意亦已疎矣

挑菜棄蔬

孝子傳曰。范宣挑菜傷指大哭。人問其故。答曰。身體髮膚不敢毀傷。故啼。高士傳曰。鮑焦周末人。隱居不仕。終日採蔬而食。子貢曰。今子惡其君。處其土。食其蔬。何志行之相違也。焦遂棄其蔬而餓死。

孝子菜仙奴葵

孝子傳曰。孝子洛陽公嘗輦水作漿。以

給過者。不取其直。天神化為壽生。問公何不種菜。曰。無種。即遺數升。公種之。化為白璧。餘皆為錢。下見冬葵。

隨風薤傾日葵

荆山圖曰。佷山縣山下有石牀。傍生野薤。人往乞者。神或許之。則風吹薤葉。制其分。人隨風偃而剪之。不得過越。陸機園葵詩曰。朝榮東北傾。夕穎西南晞。凶墟菜壽木華。

漢書張竦曰古叛逆之國。潞其宮室以爲汙池。名曰凶墟。雖生菜蔬而民不食。呂氏春秋曰。菜之美者。崑崙之蘋。壽木之華。赤木之葉。

一宿葵三種菜

博物志曰。陳葵子微炒令爆。吃散著熱地中。遍踏之。暮種朝生。不過宿。下見食菜。

豐本傷根

祭宗廟之禮。韭曰豐本。古詩曰。採葵莫傷根。傷根葵不生。

蕞風海月

吳都賦曰。草則蕞風扶留。蕞風菜名。通作東。謝靈運詩曰。揚帆采石華。掛席拾海月。石華附石生。海月如鏡。野菜可食。

金鹽玉豉

王屋山人云。何以得長年。何不食石蓄。

金鹽何以得長壽。何不食石。用玉鼓金鹽五加也。玉鼓地榆也。皆可煮石而餌。鑽冰蒙露。

夏侯湛賦曰。見芳薺之時。生被畦疇而獨繁。鑽重冰而挺茂。蒙嚴霜以發鮮。陸機園葵詩曰。翩翩晚彫葵。孤生寄北蕃。被蒙覆露惠。微軀後時殘。

象蛤如飴

上見三種菜。毛詩董茶如飴。

留韭拔葵

晉書曰。庾公就陶侃食韭。每留白。陶問何爲。云欲種。陶嘆曰。吾子非惟風流。兼有爲政之實。下見拔葵。

釀蓼書葵

傅毅七激云。鴛釀之蓼。注釀謂雜切也。北齊書曰。彭城王攸種葵。種三畝。常被入盜取。王密書葵葉。明旦入市看之。遂得偷者。

師曠占苻堅夢

師曠占曰欲知牛馬之貴賤秋葵下小
葵生牛馬貴大葵不蟲牛馬賤 異苑
曰苻堅將欲南師夢葵生城內明日以
問婦婦曰若征軍遠出難為將也
漆室憂監門泣

列女傳曰魯漆室女倚柱而嘯鄰婦曰
欲嫁乎曰吾憂魯君老而太子少也婦
曰此魯大夫之憂女曰昔晉客舍吾家

繫馬於園馬佚踐吾園葵使吾終歲不
厭葵味 韓詩外傳曰魯監門女嬰相
從績中夜泣曰衛世子不肖是以泣其
偶問其故曰宋司馬得罪於宋奔魯馬
食吾園葵是歲亡利一半由是觀之禍
福相及也

枯夏禦冬

抱樸子曰薺麥大蒜仲夏而枯 毛詩
曰我有旨蓄亦以禦冬

果實部

緗桃縹李

西京雜記曰漢武初修上林苑羣臣遠方各獻名果有緗核桃紫文桃霜桃金城桃左傳曰齊都霜露李房陵縹李馬肝李鴨卵桃

郭義恭廣志曰麥李細小有溝道有黃建李青皮李馬肝李赤李房陵李漢武內傳曰西王母以七月七日降帝宮

命侍女索桃須臾侍女以玉盤盛桃七枚如鴨卵形圓色青以呈王母王母以五枚與帝自食二枚

勾鼻桃細腰棗

鄴中記曰石虎苑中有勾鼻桃重二觔半廣志曰棗有狗牙雞心牛尾羊角獼猴細腰之名

青田梨元洲奈

永嘉記曰青田村人多種梨有一株名

曰官梨一圍五寸用以供獻又名御梨
列仙傳曰謝元卿遇神仙設元洲白
柰

張公梨韓眾李

廣志曰洛陽北邙張公夏梨海內惟有一
樹廣都梨重六觔數人分食之 洞
冥記曰琳國生玉葉李色如碧玉昔韓
眾嘗餌此李因名韓眾李一名韓終李
西平柑南安栗

范甯表曰南昌令解列西平里有一柑
樹枯死一年今年更生枝葉豐茂王
褒僮約曰南安拾栗採橘注曰南安縣
名出好栗橘

黃苞柑元室柰

潘岳笙賦曰披黃苞以授柑傾縹菴以
酌醪 南岳夫人傳曰夫人姓魏名華
存性好神仙季冬夜半有四真人降夫
人靜室因設元室紫柰絳實靈瓜

金杏玉瓜

地理志曰。分流山上多杏。大如梨。黃如橘。土人謂之漢帝杏。亦曰金杏。抱樸子曰。五原蔡誕入山而還。欺家人云。至崑崙山有玉瓜。光明洞徹而堅。須以玉井水洗之。軟而可食。

羊角棗狸頭瓜

鄴中記曰。石虎園中有羊角棗。三子一尺。廣志曰。凡瓜之所出。以遼東廬江

杏。燉煌之種為美。有魚瓜。縑瓜。狸頭瓜。蜜

筩瓜。女臂瓜。羊骸瓜。

哀家梨朱仲李

世說曰。桓南郡每見人不快。輒嘆曰。君得哀家梨。當復不蒸食否。潘岳閒居賦注曰。房陵朱仲有李園三十六所。三元奈五色瓜。

南岳夫人傳曰。南岳夫人還王屋山。王子喬等並降。時夫人與四真人為賓主。

設三元紫柰 史記曰邵平故秦東陵侯秦亡後為布衣種瓜長安城東瓜有五色

六出杏八稜柿

西京雜記曰上林苑有蓬萊杏東海都尉于台獻一株花雜五色六出云是仙人所食者 地理志曰梁侯國有烏椹柿八稜

杏酪桃膠

荆楚歲時記曰孫楚祭介之推云飭一盤醴酪二盃今寒食有杏酪麥粥即其類也 抱樸子曰桃膠以桑木炭漬服之愈百病久服體有光能絕穀又神仙傳曰高丘公服桃膠而得仙

度索桃房嵯棗

山海經曰東海有山名度索上有大桃屈蟠三千里名曰蟠桃 洞冥記曰房嵯細棗出房嵯山山臨碧海此棗萬年

一實。笮之有膏。可用然燈。漢武帝元鼎
元年起招仙閣。進房塘棗。

夫人棗王母桃

廣志曰。梁國園出大白棗。又有夫人棗。
述異記曰。崑崙山有仙人桃。其色赤。
表裡照徹。得霜乃熟。又名王母桃。

鼠李雞菱

述異記曰。杜陵有金李。大者夏李。小者
鼠李。風土記曰。翠水中菱如飛雞。故

名翻雞菱

四角菱三節蕨

本草注曰。菱。菱也。一名芰。一名水栗。莖
上有刺。花黃白色。有數種。或四角。或三
角。或青苞。或紫苞。八九月間熟。世說
曰。扶南蕨一丈三節。見日即消。見風即
折。

鹿心柿狸首瓜

廣志曰。柿有數種。有如牛心者。有如雞

新珍卷四
五
鴨卵者。又有名鹿心者。陸機瓜賦曰。金釵蜜筍。小青大班。元骿素腕。狸首虎蟠。

鴻頭芡羊髓瓜

周禮注曰。芡雞頭。一名鴻頭。下見狸頭瓜。

中山栗大谷梨

何晏九州論曰。中山好栗。潘岳閒居賦曰。張公大谷之梨。

合枝李同蒂瓜

西京雜記曰。漢武初修上林苑。羣臣各獻遠方果樹。有合枝李。續漢書曰。安帝元初三年。平陸有瓜。異本同蒂。

冰谷瓜玉門棗

郭子橫洞冥記曰。有龍肝瓜。長一尺。花紅葉素。生於冰谷。所謂冰谷素葉瓜。漢武內傳曰。七月七日。西王母當下。帝設玉門之棗。

黃中李紫輕梨

遊仙記曰王母居龍月城有名李實上皆有黃中二字王母惜之過於蟠桃又曰老子西遊太真王母供以紫輕梨千年一花冬月乃煎膠食之身輕如太虛

萬歲桃三月棗

拾遺記曰崑崙山去扶桑五萬里日所不及有桃樹千圍其花青黑色萬歲一

實 廣志曰西王母棗三月熟在衆果之先

三花棗五色杏

異苑曰太元中南郡江陵縣有棗樹一年忽生桃李棗三種花 下見六出杏賭博瓜鹿盧棗

列仙傳曰谿父者南郡鄱人居山間仙人教之服閭海邊諸洞中仙人賭博瓜數千頭令瞑目乃上方丈山 郭璞曰

子細腰者今謂之鹿盧棗
再熟橘又生瓜

潘岳橘賦曰余齋前橘樹冬夏再熟
齊書曰韓靈敏兄靈珍早孤並有孝性
家貧無以營葬共種半畝瓜朝採暮又
生遂辦葬事

瓶梨斗柚

辛氏三秦記曰漢武帝園一名樊川一
名御宿有大梨如五升瓶落地則破取

者以布囊承之名含消梨
廣志曰成都
都有柚大如斗

夏橘霜桃

張勃吳錄曰朱光爲建安太守有橘冬
月樹上覆裹之至明年春夏色變青扶
尤酸絕美上林賦云盧橘夏熟盧黑色
也蓋近是乎西京雜記曰漢武初修
上林苑羣臣各獻遠方名果有紫文桃
金城桃霜桃霜下可食

鬼梨仙杏

幽明錄曰成彪兄喪晝夜哭兄提二升酒一盤梨就之引酌相勸彪問略答良久瀉餘酒著瓶中挈鬻而去述異記曰杏園洲在南海中多杏云仙人所種漢時常有人舟行遇風泊此洲五六月日食杏得不死

官梨御橘

永嘉記曰青田村人多種梨有一株名

曰官梨一圍五寸以供獻異物志曰交趾有橘官長一人秩二百石主歲貢御橘

抱柰乞瓜

孝子傳曰王祥後母庭中有柰樹始著子使祥守視晝驅鳥雀夜驚蟲鼠時雨忽至祥抱樹至曙母見之惻然幽明錄曰孫鍾富春人與母居至孝種瓜爲業有三年少來乞瓜爲鍾定墓地出門

悉化為白鶴孫權祖也

梅腊梨膠

山海經曰雲山之上其實乾腊郭璞注曰腊乾梅也下見紫輕梨

玉葉金衣

洞冥記曰琳國去長安九萬里生玉葉李色如碧玉李尤七嘆曰金衣素裏斑理內充滋味偉異淫樂無窮金衣謂橘也

車馬部

步輿臥輦

張敞東宮舊事曰太子有步輿一鄴中記曰石虎南郊有金根輦雲母輦武剛輦數百乘虎皇后出乘高路輦香衣輦或朱漆臥輦

朱轂紫蓋

續漢書輿服志曰小使車者蘭輿皆朱赤轂白蓋赤帷從騶騎四十人皆追捕

考索有所敕取者之所乘也 魏收後

魏書曰安車紫蓋朱裡與公侯同子男

皂蓋青裡

青牛白鹿

關令內史曰老君乘青牛車過京邑

葛洪神仙傳曰沈義學道於蜀中與妻

共載道逢白鹿車一乘

珠輪銅較

華覈駟馬賦曰鞍罽緝裘珠輪玉光

許慎說文曰較車騎上曲銅鉤也

三蓋七香

漢官儀曰金根車有三蓋一曰芝車

魏武帝與楊彪書曰今贈足下畫輪四

望通憶七香車二乘犝牛二頭

輪重牙轅兩尾

董巴輿服志曰乘輿金根車五乘輪皆

朱斑重牙貳轂 張揖埤蒼曰輕車轅

兩尾

琇瑁廂茱萸輜

周遷輿服雜事曰五輅兩廂之後皆用琇瑁鷓翅注曰鷓大鳥名其羽織利故車廂象之石崇奴券曰作車當取大良白槐之輻茱萸之輜

記里爲營

內傳曰黃帝遊幸天下以車記里又晉輿服志曰記里鼓車過江亡失制度謝安率意造焉及獲京師舊輦形制無差

漢書曰衛青伐匈奴以武剛車自環爲營

三望五色

沈約宋書曰沈慶之每朝賀常乘猪鼻無憶車左右從者不過三五人每農桑劇月無人從行過者不知其爲三公也及廢帝賜三望車謂人曰我每游履田園有人時與馬成三人無人時與馬成二人今乘此車安所用之乎漢官儀曰天

子有五色車皆駕四馬又宋書曰立車五色安車亦如之皆天子之車也

豹尾鹿角

漢官儀曰豹尾車右武衛隊正一人在車執弓箭 晉紀曰馬隆討羗依八陣圖作偏廂車地廣為鹿角車路狹則為木屋施于車上且戰且前弓矢所及應弦而倒

青龍紫燕

呂氏春秋曰伊尹說湯曰天子不得至味故須青龍之匹遺風之乘 西京雜記曰文帝自代還有良馬九匹皆天下駿也一名浮雲一名赤電一名絕羣一名逸驃一名紫燕一名綠離驄一名龍子一名麟駒一名絕塵號為九逸

歎玉流珠

穆天子傳曰天子東游於黃澤宿于曲洛曰黃之淹其馬歎沙皇人威儀黃之

澤其馬歎玉皇人壽穀 傅亮乘輿馬
賦曰揮沫成霧流汗如珠

奔霄追電

拾遺記曰周穆王卽位巡行天下馭八
龍之駿名曰絕地翻羽奔霄越影踰輝
超光騰霧挾翼 古今注曰秦始皇有
七馬名曰追風白兔躡景追電飛翮銅
爵晨鳧

麟形鷄目

張駿山海經圖畫讚曰敦山有獸其名
爲穀麟形一角 尚書大傳曰散宜生
之犬戎氏取美馬驄身朱鬣鷄目者取
八九焉陳於紂之廷

房精震象

瑞應圖曰馬爲房星之精又曰龍馬者
神馬河水之精也 梁元帝答齊國雙
馬書曰河精耀采似伏波之鑄銅震象
飛文笑東瀛之刻玉

金埒玉珂

王隱晉書曰王武子好馬買地試馬謂之金埒梁簡文帝西齋行馬詩曰晨風白金絡桃花紫玉珂影斜鞭照耀塵起足蹉跎

紫茸翠飾

魏志曰百官各有紫茸題頭高橋鞍一具鹽鐵論曰古者繩鞅草鞮皮薦而已其後代以革鞍鐵鑣爲飾又其後有

金銀翠毛之飾又有障泥障汗鞞尾亦從鞍以爲飾

徘徊輿馳逐車

晉書曰桓宣體大不堪乘馬作徘徊輿施轉關令迴動無滯說苑曰晉平公爲馳逐之車掛之以犀錯之以羽立於殿下羣臣得觀焉田荅三過而不觀公大怒荅曰桀以奢亡紂以侈敗是以不敢觀也平公乃去車

霹靂輻輳

魏志曰太祖還官渡與袁紹合戰紹為高檣起土山射營中眾大懼太祖乃為發石車擊紹樓皆破紹眾號曰霹靂車孟康曰輻輳車形如衣車有牕牖閉之則溫開之則涼故名

辟惡追鋒

古今注曰辟惡車秦制也桃弓葦矢所以祓不祥太卜令一人在車前執弓箭

傅子云追鋒車施通幟遠則乘之

飛車獵輦

括地圖曰奇肱民能為飛車從風遠行湯時西風久奇肱車至於豫州去玉門四萬里鄴中記曰石虎好遊獵體壯大不堪乘馬作獵輦使二十人舁之坐處施轉關若射鳥獸宜有所向開身而轉之

葦車榆轂

漢書云袁閔為沛相乘輦車到官以清亮稱風俗通云桑車榆轂聲聞數里俗說凡人柔桑作車又以榆為轂牢強朗徹聲響乃聞數里

鸞車雲輦

仙志太真夫人登白鸞之車漢武內

傳曰西王母乘紫雲之輦

九逸三羸

上見紫燕相馬經伯樂曰凡相馬之

法先除三羸五駑乃相其餘

果下水中

魏志曰濊國出果下馬漢時恒獻之高三尺乘於果樹下行漢書曰武帝時天馬出渥洼水中又元狩二年馬生余吾水中

連錢夾鏡

梁元帝詩曰長安美少年金絡飾連錢顏延之赭白馬賦曰雙瞳夾鏡兩權

協月

桃林蘭池

山海經曰。夸父山北有林曰桃林。廣三百里。中有良馬。梁元帝後園看騎馬詩曰。良馬出蘭池。連翩驅桂枝。

齒平耳豎

漢書曰。衛瑄奏馬高五尺九寸以上。齒未平。不得出關。注。馬十歲齒平。相馬經曰。馬耳欲得相近。而前豎小而厚。

東臯北野

晉劉恢詩曰。東臯有一駿。名曰千里駒。爾雅。駒駘。北野之良馬。

度繩戀棧

風俗通曰。疲馬不能度繩。按繩疑作澗。齊有澗水。裁廣三四步。言馬之疲不能度此水也。晉紀曰。桓範出赴曹爽。宣王謂蔣濟曰。智囊往矣。濟曰。駑馬戀棧豆。爽必不能用也。

舟楫部

梁麗吳艚

莊子曰梁麗可以衝城司馬彪注曰麗小船也張揖埤蒼曰艚吳船也音彫

翔鳳飛龍

陶季直京都記曰宋孝武渡六合龍舟翔鳳而下三千四十五艘舟航之盛三代二京無比晉宮閣名曰天泉池中有紫宮舟曜陽舟飛龍舟靈芝池中有

鳴鶴舟指南舟舍利池中有雲母舟
鷓首鴨頭

方言曰船首或謂之閣又謂之鷓首注曰今江東貴人船前作青雀是其象也
吳志曰太傅諸葛恪制為鴨頭船

餘皇太白

春秋左傳曰吳伐楚戰於長岸吳獲其乘舟餘皇以歸蜀王本紀曰秦為太白船萬艘欲以攻楚

馳馬逐龍

古今注曰孫權名小船為馳馬 洞冥記曰露池西有昆靈池方四百步中有逐龍舟

蒼隼青雀

晉令曰水戰有飛雲船蒼隼船先登船飛鳥船 王隱晉書曰陶侃擊蜀賊王真真以鈎得上侃青雀船

五樓三翼

吳志曰曹公出濡須孫權使董襲督五樓船住濡須口 越絕書曰越為大翼中翼小翼船以資軍戰

鸚鵡鸛

蜀王本記曰蜀王有鸚鵡舟 輿服雜事曰遠國朝貢越海則有大船一名鸛

梅筏栢桴

地理志曰梅湖者昔有梅筏沉於此湖

有時浮出。至春則開花。流滿湖矣。越絕書曰。木客大冢者。勾踐父允常冢也。初徙瑯琊。使樓船卒伐松栢以為桴。故曰木客。

蘆穉荃橈

吳錄曰。孫策欲渡江。舫少。乃夜伐蘆為穉。以佐渡船人。楚詞曰。荃橈兮蘭旌。注曰。荃。一作蓀。香草也。

霧拖風帆

張華游仙詩曰。游仙迫西極。弱水隔流沙。雲榜鼓霧拖。飄忽凌飛波。風土記曰。帆從風之慢也。又傅克賦曰。雲帆齊張。

撞雷挾電

洞冥記曰。昆靈池中有撞雷舟。又曰。昆靈池中有凌波艦。挾電艦。

鯨吞龍負

吳都賦曰。長鯨吞航。修鯢吐浪。豫章

記曰吳猛坐郭璞事被收載往南令船
弗開戶船主聞船下有聲如在木杪試
竊觀之有二龍負舫一夕至宮亭湖還
豫章

文鵠翠虬

司馬相如子虛賦曰怠而後發游于清
池浮文鵠揚桂棹張翠帷建羽蓋傳
毅洛都賦曰停清沼以汎舟浮翠虬與
元武

鴻毛青翰

洞冥記曰影娥池中有鴻毛舟說苑
曰鄂君乘青翰之舟張翠羽之蓋會鐘
鼓之音越人擁楫而歌曰今夕何夕今
舉洲中流今日何日今得與王子同舟
山有木兮木有枝心悅君兮君不知于
是鄂君揄袂而擁之舉繡被而覆之
若樹葉如蓮花

湘州記曰繞川行舟遙望若一樹葉

風土記曰漂汎如散蓮花注曰漂汎者言船之在水如蓮花散落浮于川也

風駭雲浮月移日轉

夏侯弼吳都賦曰巖巖船艦汎汎楊舟雍河傑峙風駭雲浮楊修出征賦曰泛順風而回艦徐月移而日轉

飛鳧鳴鶴

抱樸子曰屈原沒汨羅之日人皆命舟楫以迎之至今以為競渡或以水車謂

之飛鳧亦曰水馬 下見飛龍

青桐赤檜

風土記曰青桐大船即諸葛恪所造鴨頭船也樟柟諸木皆多曲理盤節最為堅勁楊泉五湖賦曰赤檜為櫂檀槩細堅

金船瑤楫

瑞應圖曰王者德盛則金人下乘金船遊王後池抱樸子曰瓊艘瑤楫無涉

川之用

土船石帆

世本云廩君姓巴氏與樊氏暉氏相氏
鄭氏凡五姓皆爭事鬼神以土為船彫
文畫之而沈於水約船浮者當以為君
他姓船不能浮獨廩君船浮因立以為
君長 永嘉記曰郡有石如帆相傳有
神人以破石為帆故云

蘭鷁蔥鷁

謝朓賦云列攢笳兮極浦弭蘭鷁兮江
潏 劉楨魯都賦云綠鷁蔥鷁注皆船
名

五會七帆

藝海洞酌曰五會舟名合五板以為船
也 吳時外國傳曰從加那調州乘大
舶張七帆順風一月餘乃入大秦國
水龍飛馬

隋文帝詔曰陳國未盡藩節誠須責罪

興師若命水龍終當屈戰謂戰船也
江表傳曰孫權名舸為馬言飛馳如馬
之走陸地也

雀室牂柯

釋名曰船上屋曰盧其上重室曰飛盧
又在其上曰雀室於中候望若鳥雀之
驚視也 異物志曰有一山在海內小
而高俗人謂之越王牂柯牂柯繫船杙
也

荷蓋桂牕

曹植擬楚詞曰愬流兮遠邁貝船兮荷
蓋 梁元帝詩曰青雀歸松澗臨流影
桂牕

瓜皮竹節

王濬集云瓜皮船本圖倉卒用之耳寧
可深入敵境耶 山海經曰衛丘之田
有大竹可為舟注曰一節竹為之

載土贈竹

吳書曰洪規罷郡會稽歸無資糧又不欲令人知乃載土而返又曰褚珍字孔璉罷烏傷令單船而返故人羊衡就乞土物惟抽船下一竹贈之曰東南之美唯竹箭貞而節也

購艦戩戩

吳志曰呂蒙襲關羽晝伏其精兵購艦中使白衣人搖櫓以進博雅云戩戩棧棧所以繫船

藏骨楫裹頭篙

袁宏東征賦曰擢弱楫之弗施投洪流之藏骨盛弘之荊州記曰魚復縣瞿塘灘上有神廟極靈驗刺史二千石經過者皆不得鳴鼓角商旅恐觸石有聲以布裹篙頭

繡帆絲笮

倦遊錄曰劉濬白舫百棹皆繡帆青簾多載妓女漢鼓吹曲云桂樹爲君船

絲為君箝注箝作也起也起舟使動行也

編珠第四卷終

男高軒輿全校字



